

四庫全書

集部

欽定四庫全書

集部

石倉歷代詩選卷二百五十三
五

詳校官庶吉士臣范逢恩

侍讀臣孫球覆勘

總校官進士臣朱鈐

校對官庶吉士臣潘庭筠

謄錄監生臣周士標

欽定四庫全書

石倉歷代詩選卷二百五十三

明 曹學佺 編

元詩二十三

黃清老

福山菴

晨光海上來雲氣升萬壑雞鳴落花中殘鐘度城郭
庵僧戴星出我自飯藜藿寧知天地心但有山水樂書燈

夜搖動霧氣侵几閣開扉得新月欲掩見栖雀煙霞暫
相違筆硯庶有托但留松間雪付與雙白鶴庭柯換故
葉林竹脫新籜何日芝草開拏舟赴前約

古詩送王君冕歸陝西

麥熟天乍熱開軒理瑤琴茲辰有客至一徑蒼苔深日
出樹影倒曠坐分綠陰清談落餘花松風雜幽禽君子
希道德永言結同心

其二

狂風捲茅屋遙見溪上山人生有遇合離別何足歎黃
鵠將西歸臨水振羽翰我有雙明珠置之青雲端朝朝
復暮暮照君千里還

其三

少年處山谷壯歲遊京師性本猿鶴羣焉能牛馬馳曩
有採薪憂掛冠願爲醫近得聖賢對讀書甘如飴習貫
已成癖豈無君子知

其四

十載宦京輦田園就荒蕪茲焉得歸耕休馬南山隅舉
酒樹色動鶯燕鳴相呼流水既悅君白雲亦邀余錦囊
可贈還愧非明月珠

燕中懷古呈貢侍御

娉婷二八女絕色妙難畫新粧薄鉛華照影修竹下盛
年事夫婿錦玉耀精舍雖非伯鸞妻倦繡惜春夜琴餘
月當軒默默倚風榭寄語東家兒紅粧莫輕嫁

送李子威代祀嵩衡淮海二首

羣生望甘澤五岳雲氣通天香落巖谷瑞靄春冥濛海
潮天際來金碧森萬峰劃落紫翠堆亭亭玉芙蓉古廟
絲竹存迎神奏黃鐘空山遍餘響落花舞青童

其二

南海祝融宅汪洋載神州巨浸含萬有元氣何空浮蒼
蒼島嶼間彷彿通十洲神魚在深淵甘霖何以求朝折
若木枝夕飲桐栢流萬里竟探討豈徒司馬遊

古樂府

君好錦繡段妾好明月珠錦繡可爲服服美令人愚不
如珠夜光可以照讀書

其二

君好春芍藥妾好夏池蓮芍藥多豔色春風迷少年不
如蓮有實可以壽君筵

尋故人

適興一尋君君家在白雲寒花秋後見落葉夜深聞隨
意坐苔石呼童煮澗芹不須談世事詩思正紛紛

登平遠臺龍頂峰

六龍簸蕩玄圃碎三島崩騰失空翠
海風掣斷南山雲分我滄江半江水
臺南巖谷青岌岌竒松怪石作人立
山巔恐有風雨來林徑空濛落花濕
水東劣窮結平綠積霧飛嵐坐堪掬
蓬萊迢迢幾萬里一碧天光浸寒玉
吟翁回首看不足緩步策驢度空谷
誰知咫尺山中幽望斷殘暉立脩竹

天馬山

溪隨天馬西北行半空忽見蓮花生雙鸞欲下却飛去
旌旗引入丹霞城攀蘿上到猿啼處恍然曠坐消百慮
千山無人雲氣深終日徘徊不能去虛空樓閣時自開
異香忽起三清臺風吹笑語落天半疑是神仙跨鶴來
百花潭上春自照白鹿呼人猿亦嘯路迷不敢輕問津
恐有賢人隱耕釣蒼厓九折樵徑通絕頂可見西崆峒
塵心豁然臂欲羽竦身直上凌天風

夜宴友人席上有懷

青山林下啼斑鳩綠楊門前嘶紫騮落花成陣作春雨
東風淡淡雲悠悠美人捲簾日在手胡蝶飛上珊瑚鉤
南山不見笋成竹擬約滄波同倚樓

貢闈偶成呈同院諸公

射宮圍棘斷經過閒却秋聲太液波風定碧簾聞禁漏
夜殘銀燭見星河仙人共對青藜杖詞客孤眠白玉坡
弱水蓬萊三萬里不知何處月明多

雪夜直宿玉堂

琪樹花生禁漏遲
金莖月色近書闌
白雲入水春無跡
銀漢橫空夜有輝
竹靜似聞蒼玉佩
松寒欲傍綠荷衣
乾坤清氣蓬萊表
獨坐天風拂翠微

張志道別都

竹寺西軒共聽琴
杏花猶記紫囊吟
溪山老我扁舟興
風雨知君萬里心
滄海夜潮雲漢濕
蓬萊春樹碧雲深
三年離別樽前話
傾倒何時更似今

庚午興聖殿進史

瑤編恭進侍明光日麗龍池晝刻長堤柳染成春水色
宮花併入御爐香金壺灑露層階滑玉梳分冰廣殿涼
矇眊似知天意喜鳳笙新奏五雲章

梧桐雨

曾將秋信報人知又與西風泣別離刻綠滴殘猶有淚
題紅流去更無詩舊巢鳳冷朝飛遠古井金寒曉汲遲
待得楚臺雲散後却憑琴調寄相思

題平翠樓

華樓突兀摩蒼天，清吟飛上神飄然。
虛欄六曲拂雲起，蓮峰千仞當樽前。
晴嵐帶霧結秋色，脩竹過雨鳴寒泉。
東風一笑歌石鼓，心期試問金鰲仙。

友人擬古樂府因題十絕句

早晚臨粧鏡，秋容怯玉鈿。
君心如日月，照妾似初年。

其二

采苻歸來午花梢，日轉廊綠陰涼似水。
不見洗紅妝。

其三

生愛東鄰女蛾眉畫不如近來機杼廢臨得右軍書

其四

漫道從軍樂風霜只獨居三年遼水上不得一行書

其五

海上扶桑景清光日見君祇愁風雨夜西北有浮雲

其六

今夜中秋月含情獨上樓辰星三兩點偏照玉簾鉤

其七

自見南樓月頻頻夢楚州無端今夜雨祇作小山秋

其八

露井疎桐晚風亭碧藕秋捲簾山月上水宿見雙鷗

其九

堂上春花老流泉日繞山願爲雙白鶴雲路載君還

其十

天子西巡狩彤弓錫虎臣樓蘭何日斬看汝畫麒麟

登福山遇僧偶出二首

欲扣禪關未有詩
滿山空翠濕人衣
竹間倚杖到西日
試看白雲歸未歸

鷺嶺雲深杖屨幽
竹風松影共悠悠
何人分得僧家榻
坐看南山一片秋

友人見訪不遇

君來白鶴下青冥
我入春山聽曉鶯
可惜小樓風雨過
無人收拾萬松聲

牧牛圖

平原雨多煙草浮牧童驅牛如挽舟柴門正在水深處
青山流過屋西頭

石倉歷代詩選卷二百五十三

欽定四庫全書

石倉歷代詩選卷二百五十四

明 曹學佺 編

元詩二十四

張翥

題楊太史山居圖

湖上山居好
奎題厭翠微
煙霞改舊色
林壑發清暉
松晚看書罷
荷涼坐釣歸
圖中有真趣
須此掛朝衣

題汪會語村隱居

聞道荆村僻幽居趣自成桑中豚甯晚片外燕泥晴苔
石留僧坐山樽遲客傾憑軒久不到望處白雲生

伍牧

宋將尹玉援常
州戰死于此

苦戰勤王事精魂泣鬼雄壞城兵氣黑遺鏃血花紅故
老談亡國明時錄死忠長吟一搔首落日鳥呼風

螢苑曲

楊花吹春一千里獸艦如雲錦帆起咸洛山河皆帝都

君王自愛揚州死，軍裝小隊驅美人。
畫龍鵠汗金麒麟，香風搖蕩夜遊處。
二十四橋珠翠塵，騎行不用燒紅燭。
萬點飛螢炫川谷，金釵歌度苑中來。
寶帳香迷樓上宿，醉魂貪作花月荒。
肯信戟劒生宮牆，爛斑六合洗秋露。
尚疑怨血凝晶光，至今落日行人路。
鬼火孤鳴隔煙樹，腐草無情亦有情。
年年爲照雷塘墓。

重賦明山歌送胥式有儀還武昌

盱母城南隱居者，一生耕鑿盱南野。
何年移入明山來，

築樓山巔雲在下環山小塢三十六中有清池蔭桑竹
日高塢口煙霧稍稍見行人出深谷池頭古井穿石空
絕底暗與江流通井中鯉魚長尺半人不敢取疑蛟龍
隱居何人曾子白誰其從者胥生式先生喜與山爲徒
意不在仙在樓居胥也來讀山中書清泉煮酒不用酤
興酣題詩滿青壁墨痕入石青模糊華蓋浮丘石門麻
姑隣峰丘壑可游衍山中之樂適吾軀生今掉頭不肯
住京塵茫茫歲云暮豈知邛亦愛山人未辨山貲得歸

去曾先生幾時把袂明山行灑掃樓上聽松聲黃精飽
啖一千日飛上丹梯朝玉京

息齋竹石古木爲會稽韓季博士題

老竹葉稀多禿枝新篁碧潤含幽姿籜中龍子振春蟄
突出雷雨頭參差傍蹲恠石石罅裂裂處恍惚疑龍穴
山中有樹皆十圍活榦撐青死槎折霜皮食盡乾蘚文
半頂斬立雙極分最後一株身出羣垂枝倒走陰崖雲
李侯標致不可得小字親題別塗黑縱橫不在摩詰下

蕭爽直與洋州敵玉堂學士欣見之濃墨大書真崛奇
森然一片鐵石筆妙甚七字瓊瑰詞此詩此畫今兩絕
把玩微風動毛髮只應真宰泣凋鏤一夜山窗冷秋月
上清薛茂弘虞內翰以鶴齋號之爲賦

羽人新得虞翁號歸築衡茅並翠微丹室有風鳴夜帳
斗壇多露濕秋衣畫中昨者薛少保華表他年丁令威
直擬身形煉相似玉笙吹上白雲飛

登六和塔

江上浮圖快一登望中煙岬是西興日生滄海橫流外
人立青冥最上層潮落遠沙羣下雁樹欹高壁獨巢鷹
百年等是豪華盡懶把興亡問主僧

三月望日遊虎丘寺題小吳軒

海湧峰前雲樹盤佛宮飛閣出巔岬虎來古塚金精白
龍卧秋池劒影寒禪老說空留壞石鬼仙題雨下虛壇
憑高不盡登臨興更借西山晚翠看

題金陵

運盡黃旗晉祚開
天星俄復圻三台
方驚掘地雙鸞起
即見浮江五馬來
草暗離宮碑卧土
雨殘耕地骨生苔
當時一掬新亭淚
誰信清談自有才

吳江

坐倚風檣看太湖
波濤瀕洞半三吳
寒通上界咸池氣
竊入中流水伯都
雲暗蛟龍應起立
雪深鴻雁自驚呼
望亭有酒宵堪醉
買得漁家一尺鱸

寄題杜原父懷友軒

尺五城南近世紛移家來並武夷君他年功業誰青史
此日山林自白雲石氣曉侵書幌濕溪聲時雜棹歌聞
故人已同栖約杖策行穿虎豹羣

中秋對月時張外史有約以醉不赴

明月中天雲霧消酒醒涼思正飄飄星河不動秋空濶
鐘鼓無聲夜寂寥露下遠山皆落木風來滄海欲生潮
仙家玩事無緣到虛負瓊樓聽玉簫

鳳山

衰草寒煙老木風南朝佳氣落秋空壁來山鬼遮秦使
盤泣銅仙別漢宮壞埒尚傳祠乙鳥荒池曾見射飛鴻
騷人自古多荆思長在登臨感慨中

題上清張道士壺洲

錦水東頭觀闕青仙家元不隔滄溟鳳麟洲渚寒凝碧
雲霧衣冠夜降靈金醴浸花留客醉玉簫吹月使龍吟
看君福地容蕭爽長與曾孫宴幔亭

鐵笛爲孟天暉作

愛此輕圓鐵鑄成何須楚竹選孤生年多化作青蛇色
夜靜吹如彩鳳聲繡出碧花凝錯落冷涵金氣發鏗清
最宜携向君山去一聽仙翁奏月明

附柳貫

度居庸關

居庸朔方塞始入兩崖張行行轉石角細路縈澗岡層
壑倒天影半林漏晨光崎嶇里四十所歷萬羊腸千轅
絡前後兩軌通中央谷開稍夷曠在險獲康莊豈惟遂

生聚列廛叅雁行激流或磯磴架戶亦僧坊我生山水
窟愛此不能忘是日新雨歇浮嵐亂沾裳水聲與石鬪
風飄韻清商跼轡不知高浮雲翼超驤考牒曩有聞經
途今始詳緬惟古塞北八州猶漢疆控扼識形勢會同
知樂康屬茲景運開六服連綏荒兩京備巡幸離宮岌
相望守岳將孝制如祠匪求祥式瞻龍德中足徵王業
昌請繼王會圖勿賡祈招章

李老谷聞子規

老杜聞子規近在東西川猶云感時物收淚寫幽悵今
我行塞徼子規相後先時夏雲景晦鳥呼搖空煙響入
樹窅窅啼垂血濺濺想知岐路難不恤軀命全千聲復
萬聲喚我歸言遄苟非木石心豈免腸內煎江南叢薄
間有花名杜鵑開時是鳥至相戒治春田不歸如江水
負此今五年風土孰云異物情要有遷寄巢勿浪出祝
爾還自憐嚴程趣行邁且復揮吾鞭

和袁集賢上都雜詩

出塞行瞻日趨朝喜近天離宮開苑囿馳道絕風煙瑤
水巡非遠峒山歷更綿甘泉多法從獻賦憶當年

其二

雨水漸衣黑雲沙際目黃煙開才黯慘日出已蒼涼狗
俗高簷帽清心小篆香端居萬里念蕙草惜微芳

其三

公子青絲轡王孫綠轆車宴酣風小定舞破日西斜手
擲宮中果神行海上查築鄒無自厚儉德不期奢

其四

水草方方善弓弧
戶戶便合圍
連婦女從戍到曾玄
雪毳千家帳
冰瓢百眼泉
浚稽山更北
長望斗光懸

觀寶喇鄂爾多御宴回

毳幕承空枉繡楹
綵繩亘地掣文霓
辰旗忽動祠光下
甲帳徐開殿影齊
芍藥名花圍簇坐
蒲萄法酒拆封泥
御前賜酺千官醉
思覺中天雨露低

過長城

道德藩墉億萬年長城謾與朔雲連秦人骨肉皆爲土
漢地封疆已罷邊飲馬窟深泉動脉牧羝沙暖草生煙
神京近在玄溟北九域開荒際幅員

還次桓州

塞雨初乾草未霜穹廬秋色滿沙場割鮮俎上薦黃鼠
獵獲腰間懸白狼別部烏桓知幾族他山穉落是何方
長雲西北天如水想見旌旗瀚海光

附李孝先

茅山謠

道人兩髻青如蓮大醉上山捫青天
青天蕩蕩玉盤出引手舉盤天上懸
銀海傾倒桂樹影長風吹香落丹井
地上小兒沾玉馥白兔急搗玄霜熟
惛惛仙家十二樓夜半起拂跋烏浴
手招茅君叫列仙帶劍上立紅雲前
茅君騎虎上天去道人乞我明霞篇

送方叔高賦得長安道

灞陵橋上秋風早行人曉出長安道
長安城頭烏正啼

長安陌上聞朝雞征車遙遙行復止征馬蕭蕭鳴不已
將軍年少美且都黃金箭鏃雕玉弧未央前殿進書罷
諸生拜官辭石渠將軍歸去亦草草長安道邊人羨好
莫憐賈誼謫長沙不見馮唐禁中老

越上

賀家湖上已秋風放翁宅前山影東兩行雲樹忽遠近
十里荷花能白紅遊人濯足銀潢上越女梳頭青鏡中
我欲張帆逼南斗扶桑碧海與天通

送多爾濟國王之遼東

奕世名王策駿功建分茅土鎮遼東玉符金印傳孫子
鐵券丹書誓始終滄海斷霞連虎帳黑河飛雪暗琯弓
莫忘聖武艱難日四傑從容陟降同

和宋學士晚出麗正門

暮光霞彩炫金題絳闕高居雉堞低上相樓臺連御苑
中郎車騎過沙堤皂鵬孤揆凌雲翮紫燕雙翻蹠雪蹄
回首上林涼月夜蘂珠多是鳳鸞栖

送陳杏林赴潮州醫學教授

三千驛路上灘船九品醫官半百年藥市得錢添月俸
杏林收穀當公田北書漸覺江鴻遠南食初嘗海鯉鮮
不用越巫驅瘴癘家家傳取衛生篇

大星

大星在天小星落城頭嗚嗚吹畫角津吏擊鼓河上船
行人草草居人憐男兒墜地弧矢願南北東西君莫怨

古長信秋詞

輦路青苔雨後深
銅魚雙鑰畫沈沈
詞臣還有相如在
不得當時買賦金

吳王納涼圖

六月長洲水殿涼
酒酣揮袖倚新粧
芙蓉露冷秋雲薄
迴首西風響屧廊

石倉歷代詩選卷二百五十四

欽定四庫全書

石倉歷代詩選卷二百五十五

明 曹學佺 編

元詩二十五

何中

墨梅

客携數尺紙手展墨色鮮江梅發疎花蕭然瞰清川淡
月掛寒枝孤幽弄芳妍豈非立凋後或是標春先日月

相往還何用悲歲年此花于茲時好脩乃獨賢處士窮
幽居羈臣懷左遷裁詩孤山雪擁屨羅浮煙我今亦何
恨仰視空青天世俗不貴真共把墨粉傳玄帝雖令嚴
此花不俱玄子何可素質物性亦復然夢中如聞香殘
更悟醉眠

穆山山中

江南有丘壑我生良獨閒秋風二三友謁來遊茲山山
深不見寺但見飛泉寒蛇行兩山掖天風鳴珮環青煙

從何來墮我前林端未知有往否鐘磬猶未殘長歌萬
谷應仰見數峰攢紆餘緣澗入側步寒雲闊豁然得空
曠聊復解破顏殿靜蘚花潤松危鶴聲乾僧寶燭數珠
相我盤礴觀大開雙白眼應接幾青鬟

遊燒香寺于道傍折桂而歸遂賦

欲捐世間憂徑尋林下寺古松工聽法幽鳥靜通慧鐘
傳靖國聲苔識先朝事山僮偵茶候道人玩香穠回看
爭奪區始了西來意無生安得滅有患非所致金仙一

何高淡然無可累
茫茫曠大劫幽草供深翠
出門見東村孤吹隨風駛
前林衆木奇醲薰隱幽桂
飄揚滿虛空
狂逐浩無際冥叅超欲仙
持玩倏已逝

烏石山天王寺

天王小精廬山角臨城闥
古稱藩服雄畢境環相陳塔
影六七枝瓦縫千萬鱗
煙明南臺樹潮壯方山津
老僧肯前揖似余異人人
指點壁間畫脩廡行逡巡
觀音大自在維摩妙悲顰
蒼然古木陰寒山若可親
板扉幾尊

者一一皆風神老僧太息言劫餘偶遺珍從今幾年算
此壁終成塵余笑謂老僧子意亦良勤適見俄已失當
悟無還真

雪中重過黃沙

環環磴屢折剡剡峰爭迴木陰與石浹梅花抱泉開長
思黃沙好每待春雪來陽和發坤厚寒竄失貞材引雲
賈餘勇陟飈行新媒重成一川雪步步當徘徊杉竹懸
明冰琚璫遞清哀叢石動溪響呌呌出林隈含欣耦孤

策迎賞刈蒼苔夙昔多親友茲焉起余懷

浴侯官湯泉

天氣稍清穆漿聲泊荒津湯泉冽山半取徑娛幽淪解
帶散疎髮掄漪漂閒身暢然肢體舒灑若襟懷新其下
多嘉樹細花落繽紛和風來樹間芳氣通微辛繁陰屢
移席我令鳴鳥親無爲急行邁殷勤謝舟人

閤皂山鴈水臺

兩山阨一峽幾丈落寒水蜀灘春濤壯吳江夜潮起靜

聽得天韻冥叅洞玄理遽得還未能淹回成自喜幸茲
有臺亭綠蔭極清美霏霏林香生郁郁山光委本非塵
土曾偶此一流憇所聞盡心聞我耳毋煩洗

除日文江書懷

馳外心久息求安志恒違江受風雪壓帆從波浪飛眄
彼東山雲妄行已足非為誰餞殘臘蕩漾不知歸沈沈
州郭暝黯黯煙火稀流坎理多悟孤睽情自微

樟樹鎮五公寺

久幽厭拘維暫弛欣舒散近關得禪扉擇步歷蒼蘚沈
沈松陰重灑灑水光遠殘花起餘香乳禽響新囀虛廊
清晝長高僧坐談簡學空素所昧慮妄還自遣移晷始
知歸生煙滿林晚

戊子十一月二十四日拜疊山先生于雙桐驛
蓋先伯見山同丙辰理宗親擢也先生敍舊
好言同心焉明日中賦二詩為別

吳門白日落孤妾悲洞房徙倚無所歸朔風滿羅裳昔

為春柳陰今作秋菊黃芳景不速盡愁心與俱長逝者
魂魄在九京共徜徉粲粲河吐水蕭蕭天雨霜出門即
遠道死生永相望

遊芙蓉山

十里五里石一步一長嗟行行山轉高悠悠日將斜
縈折抵深谷直下十數家來往自成村桃柳映桑麻崖杉
老絳葉石椶垂枯花陰凝四時雪陽燄一川霞誰令余
到此幽意浩無涯行將辨畚鍤來此耕山畬

其二

峒峒青芙蓉峻秀琢寒玉危流千丈飛鏗鋤石相觸幽
閼魚龍宮荒寒霧雨蓄淒神不可留前登散遐矚參差
雜花動香氣汎深谷日照丹霞開萬峰洗晴綠同心有
長鏡緩尋靈藥斲葛仙早見招庶得從所欲

其三

側足上翠微石磴八九折開盡滿崖花坐來羣香歇遊
目盡遠空亂數碧簪列草木頗蔥蘢雲興復霞蔚不知

十日雨還長幾枝
蕨山中無事業持用
慰採擷盈筐歸路
遙忽見滿山月

其四

日月碧山去香草生
還踏幽禽識履聲
閒鳴故相狎意行
不知遠清嘯得虛
答石上綠雲生巖
下紫煙合莫負今
日晴聊折山花軟

歲晚詠懷

陰風入空林玄雲
冪平野薄帷負悶
寒飛雪鳴古瓦抱

衾不成溫孤懷浩難寫荒荒豺虎區三殤無遺者王風
不列國安得猶存雅黃竹聲久沈傷來淚盈把

又

天霜不停威寒非日以槁厲颼竟吹脫未許依叢老南
山多白石終歲常皜皜乃知得至靜超然全所保妄盡
無非天心寧不違道凋落奚足懷鍾山有神草

松野即事

娛心仗老筇細數諸峰影微煙過前樹淡日在半嶺幽

鳥識歸宿遑恤雲路永冥鴻各有見日邊半行整出處
無定期是非諒難省

又

山窗一叢蕙脩葉吐紫蕤或云斷續花我亦豈敢疑楚
澤多芳草真偽奚難知浮俗尊虛明君子傷令姿博觀
貴自得清芬良在茲

秋日山行雜興

獨往非避俗散懷聊尋芳流風淡翠麓理策秋路長蒼

石舍幽色樛木落寒香一片太古雲化為孤鳳翔忽然
歸紫霄蕩灑不可望浩歌向夕霽敢事接輿狂

又

山回杉燦清崖傾花雨下詎知吾道非偶然適曠野磊
落寓隕星赴流飲奔馬風微葉時落磴寒雪白灑孤松
繁蘿轉幽峰抱嵐池景晦良遇稀心異真賞寡舉手謝
時人巖陰栖古瓦

白馬篇

冥冥子規林蕭蕭綠楊路白馬誰家兒揚鞭西南去去
去知何為不辭還寧苦陰陽速相禪乾坤幾新故丈夫
慎馳騫出門已艱步悠悠獨鳥沒霧暗連村樹

文江夜舟

北斗一何渴下飲空江流南雁知何愁相喚不自休東
浦征人歸孤燈出籬幽西淵捕魚急飛火走一舟漢皇
極寬仁今年租稅憂有生亦擾擾吾道更悠悠

曉發辭夫磯時李洞漑之友先行

荻暗雞鳴村平臯下殘月參差隣舫語舫聲帶潮發露
華望中白蓬陰散秋髮沙鳥知曙鳴海雲上空滅念我
前行友青山已飛越遲爾及相携無嗟賞心歇

龍潭阻風夜興

水宿滯前期前津北風惡林寒燈影深莎雞滿籬落荒
忽寄孤迥淒清愧離索年光星河轉夜氣衣裘覺乍駭
勁翻翻俄驚大魚躍潮痕侵柳根移船避沙閣

早發東阿午經東平晚宿汶上是日雪

嚴裝齊地曉投館魯鄉暮天寒客心速雪下車聲去迷
獸出桑畦流人披野路淺靄須城山斜橋汶津樹前聖
有遺業惆悵經行處荷蓀與耦耕何其得深趣

南浦旅懷

鄉近歲已闌猶為候風客落霏蓋蓬深三日不知息浦
樹分城煙水明遠沙色滿筐紅燭枝渡人隔村夕久滯
妻孥望孤還友朋惜音形兩睽離情生自難抑

登九仙山

吾宗九仙人煉藥此山上渺渺嘉遯心披煙一相訪海
門葱蘢外山氣崢嶸狀測日明遠潮歸霞委孤嶂塵緣
誤良契仙事敦夙尚何處乘鯉歸微風起清漾

早起

覺來日已升花梢衆禽語何許白浮萍池間散還聚起
見梅已空夜來幾更雨魚行春到水草暖香在露溪上
人語喧樵薪滿沙路

菊

我耕不半畝黃花列千叢蕭條變衰時一夕萬里風立
孤不作難英英異風骨君看牆東客夜寒步霜月

春風如少年 效程漢翁

春風如少年狂逐無定處垂楊曲江堤細草東郊路祇
言今似昔不悟新非故流水何時歸殘鶯數聲暮

招仙觀

逶迤溪南路窈窕招仙谷空堂兩道人殘棋映深竹一
葉響疎籬雙鴉啼高屋出門隨歸人遠燒在山麓

發新淦金水亭

振衣上野航回首謝山阪日淡秋水空風清片帆遠沙
光侵岼發峰影隨人轉前渡煙火深離亭路今緬

登李白酒樓

當時謫仙人四海蜚英聲偶然此一醉遂有無窮名叔
世尊放曠中度翻為輕顏波浩難返憂思誰能平

述懷

文藻風流盡天機定偶然自憐有今日猶復望他年道

遠雲千里樓危雪滿川春還問消息好去落梅邊

淮安道中

鐘聲起前林悠悠向南客天垂大野高月淡行路白雞犬淮上村雲霞海邊色舊時塞垣地來往人馳驛

朱方偶作

雪餘春水生日上暖雲泮杳靄松林中柴扉起樵爨新粧携童稚隣曲欣年換坎坎村鼓鳴沙頭酒聲亂

正月五日吾族諸老儒服縱遊

縱遊二十士遠賞物華新好是小蘭若一來中聖人桃源在何處流水不勝春歸路狂歌甚歎斜烏角巾

幽尋

意適可幽尋天空晚氣沈鷗飛一川迥花落五雲深庾子江南恨瓊奴柱下吟野風吹我老鴻雁有餘音

晚興

雁背霜花落吟悲興自如天虛鱗甲動山老鬢毛疎斷隴暮歸客寒溪人自漁蒼茫閉籬落政爾緩羊車

春郊

湖海獨垂釣風雲入短蓑
燕來春已去花少雨偏多
一飲捐愁却千杯奈醉何
青山如有意對我獨高歌

又

試數亂離年傷情更惘然
牛羊荒草樹天地老風煙白
骨蒼苔外山花野水邊
幽禽未栖宿來往自翩翩

喜雨

雲葉來西北風聲乍疾徐
冥冥天下雨湛湛圃中蔬
書

傳堪經世乾坤且助鋤欲言無與領獨立看芙蓉

奇石

奇石爭迎立青杉互引前泠泠兩溪水淡淡一峰煙閒
作題巖字時逢採藥仙蒼崖忽陡絕松影亦颺然

山中

何處征徭急茲山水石奇鳥鳴新葉長磴仄斷雲移趺
坐天正碧起行風自遲徑穿松罅去巾袂冒蛛絲

南居寺

閉戶未從容出門誰適從聊隨碧溪轉忽與白鷗逢小
雨十數點淡煙三四峰幽尋趣未已山寺已鳴鐘

病中感懷

多病他鄉外孤懷始覺愁山圍雙鷺曉門閉一蟬秋遇
合馮生缺勲名季子裘悠悠耦耕者端暇為人謀

陳家源

恐是仙源裏山從洞口開茅簷無客到稚子恠人來塘
綠魚迎日林清鳥啄苔欲令幽賞足石道泝縈迴

其二

翠霧斷崖側丹霞流水西竹從幽處密松自古來欹落
葉半藏路清風時滿溪仙家元不遠未許衆人知

龍池寺蒲石

底列貪奇意吾行亦偶然尋泉經絕壑看石到幽禪鳥
語前林日雞聲曲巷煙偶逢樵客到共坐偃松邊

立秋夕作

但覺焦源苦何當沛澤流夕風微報響古木暗藏秋未

事冥難測閒心遠作愁亂山高下碧煙靄澹浮浮

送人歸臨川

金河疎柳外去櫂響流澌為客有歸日送人愁別時寒
雲隨雁遠南雪到山遲舊隱書無態行藏莫豫期

江中

掛席亂驚湍曾過此渡難潮歸揚子晚山入秣陵寒聽
語知鄉近忘年計日寬穩行隨夜泊煙火滿江干

鄱陽湖中除夕

除夕生能幾誰無骨肉親望鄉偏恨路在遠欲遺身湖
雪殘波岼船燈獨夜人淹旬須一刻珍重故園春

行樂

行樂當幽賞晴峰帶雪欹水香梅落處沙潤草生時事
識心仍累生添疾早衰深村紅葉路樵牧轉相知

辛亥元夕

頑坐故貪默忽行時自言寒沙梅影路微雪酒香村時
序鬢髮改人家童稚喧街頭試燈候不到郭西門

贈李仲元

曾逢偏意悟顏面費追思把酒忽相語計年深自悲亂
山巖路遠秋水去城遲若到寒溪上教兒護菊籬

別唐仲謙

記名長似識相見始慚非每到極言罷却欣幽聽稀日
明山氣改江靜水痕歸添得今朝別城陰空掩扉

水口夜思

牢落不成寐荔陰寒石磯潮生灘響盡海近夜涼歸旅

思隨時改鄉音逐遞非燕南與粵北祇足費征衣

吳仲谷來喜雨

山居難適俗到縣動經年偶出成奇事相看各粲然酒
深孤菊外燈淡小樓偏草草荀陳夕他時倘有傳

除夕

歷歷諸除夕蘧廬是處安翻因歸路近始覺到家難浦
隔雁聲落蓬孤燈影寒家人應共說賓閣尚盤桓

偶書

桐寒葉落風菊淨花開雨掩映半畦秋好竹三四五對
此憔悴人忽笑不復語

飯信寺近曾文照公墓次

綠柘茅舍村青山晚煙度何處擢歌還直入深林去隔
阪數聲鐘鴉啼翰林墓

宿田家

村暗煙火生林深雞犬靜麥花如積雪月色淡相映隣
家夜汲歸寒蟲滿幽徑

漢宮春

君不見漢宮六六多佳麗
露花半染雲裾翠
少翁招得夫人魂
孤鸞夜啼月波墮
趙家姊妹專風流
雙蛾不識人生愁
芙蓉並蒂欹一朶
西飛青鳥徒離憂
飛龍翩翩上天去
雲幕椒房土花雨
墮膩埋胭恨未消
香魂尚寄寒莖舞
人間炎日焦衆芳
肯隨葵藿來傾陽
柔情幽怨透地脉
煙幃寂寞彊成粧
誰吹舊曲緣雲切
寸心婉婉應愁絕
綠羅幾疊御賜衣
紅綃半點守宮血
空留媚臉

栖餘妍遙憶羊車望幸年至今一片巫山雨化為飛泪
徒潜然故家陵苑孤雲外綠樹如雲草如海殷勤惟有
虞美人同向牆陰弄晴靄

春怨

洛人傾國賞牡丹東西繡轂家家園黃鸝紫燕新得意
柔雲如酥花迷魂遊人寂寂歸何處花亦年年占風雨
江南却遇李龜年蘇州空感楊開府誰吹玉笛斷人腸
斜橋淺淺流水香惟有千年老銅狄看盡人間幾夕陽

用歐陽文忠公神清洞韻題羅士鼎所藏米元

暉神清洞圖

潁陽之山翠煙深仙人不見勞我心叢峰峩峩照空廓
白雲時飛石欲落此中不到人間客採藥歸來花滿石
想當飛鳥墮層崖數聲清嘯驚瑤臺緱山蒼蒼今在眼
舉手招之殊未來潁陽之山夜鶴飛仙人不見歸何時
神清之洞有幽客應向洞中煮白石洞前巖下仙家春
幾片落花雜飛溜高下樓臺縹緲霞綠樹不老青山壽

王生邢子意殊勤恨我隔此浮空塵安得碧雲千萬疊
栖此人間謫墮身元暉昔作西江客夜飛墨花曉無跡
春風留此二百年幸是山中至人識有千黃金雙白壁
驚溪白蠶纔數尺潁陽山高風露寒幾處高堂掛生色

塞野縱目

讀書萬卷不經濟懶境最佳工坐睡手持綠玉信步行
穿破麥花到林際縈迴空谷舍休光隱映深松發清吹
北風掠野牧者誰牛影參差霜草悴一牛閒卧意方安

童子何知鞭已至回頭一望盡天南
高下千峰灑濃翠
冲虛宮景真堂

怡山東麓堂靜深欲尋真景真難尋
華鐘時發貞明韻
秀木遞懸天監陰天風颼颼吹余髮
戲綰幽藤作條脫
騎鳳簫驚烏石雲降龍劒照鼓山月
丹爐藥竈長周旋
六時采擷三芝鮮蓬萊書札失幽約
幾度歸潮深碧煙
古秋夜長晴雨

雲浪流碧虛雨花散前除
西風紅葉石欄曲盡併寒聲

歸綺疏回文讀罷雙蛾歛城上啼鳥稀漏點東家嬌小
乍迎郎沈水銀篝殘晚粧燈裏鏡臺閒自照紅顏相似
夜偏長

高困春冬歌

春風東來汎幽谷出門一笑人間綠新雨池塘柳帶鶯
嫩雲洲渚沙眠犢一簑一笠東西村天高地下斯人存
歸來醉醒聊隨意翠樹無言花滿門

其二

寒鴉萬點落葉赤山風蕭蕭野日白池上梅花俱有情
林間茅舍元無客人言梅花知歲寒花亦偶然冰雪間
向來羣芳令欲盡蘭芽已動春將還

題江南煙雨騎驢圖

風發發雨瀟瀟渡船未度山相招騎驢不知前路遙前
路遙抵何處南山之南且穩住莫向長安街上去京尹
今無韓吏部

黃河道

黃河道漠漠黃沙覆枯草依然南北兩空堤堤上耕人
長桑棗人心百計當若為古來河水今南移平原縣前
好沽酒車夫鞭驢莫回首

由寶塘舟行至臨汝

盧鴻十志看不足愛雪貪行雪相逐晴風吹散北山寒
三十六陂水初綠黃洲拏得罩篷船松筠繚繞煙成淵
陂聲疊下灘聲惡鮑照却歌行路難

送李仲章遠遊

風笛無聲笑指空出門誰碍更求通一帆千里客何遠
王氣雄圖江自東赤壁驚烏飛夜月衡陽歸雁落秋風
人間興廢不須問詩在江潭柳影中

秋懷

萬壑東歸晝夜流人間自是本無愁不悲白骨塌秋井
尚恨華屋歸山丘此事直須一杯酒只今何用萬里侯
明朝且可尋黃獨荷鋤徑往西山秋

其二

采采蘋花可佩香依依橘柚未全黃人行塞北非征戍
雁過江南有稻梁短笛疎鐘來別浦亂鴉飛鷺共斜陽
西風擾擾知何似看見黃花滿地霜

雨中

雨滿寒空風滿林閉門十日長悲吟不知補袞從誰語
尚許傾陽見寸心書史軒窗雲氣潤蕙蘭蹊徑蘚花深
好風為我吹晴未欲釣清溪坐柳陰

其二

炎夏如秋氣已遷
老天奇變亦多端
山橫北牖陰雲合
人對南山暮雨寒
江海窮居無米易
古今隨意得詩難
巖花落盡幽禽語
坐擁千林俯碧欄

八月二十八日

黃竹哀歌世偶傳
佳期應待後千年
曲江宮外看蒲柳
凝碧池邊聽管絃
古往今來人化鶴
天長地久帝為鵲
蓬萊水淺應聞似
徐福歸舟已失仙

夜立

冥冥無復辨秋毫
天映諸峰湧翠濤
萬里明河流眼去
三更獨雁倚風高
南隣締綌秋難貸
隔舍歌呼夜更豪
只有殷勤木上坐
共聽枯葉響蕭騷

曉晴

雨意將闌天自休
頻穿詰曲聽鈎輈
千山欲曙微霞吐
萬木含春濕翠浮
孤塔遠知城尚近
空江猶似古來流
遶汀花落白于雪
掠地風來嚴似秋

次韻彭希爽吳景傳約遊穆山

穆山祇在白雲隈
壁石為門任去來
兩澗寒聲通法席
數峰秋影散香臺
林藏僧梵含風遠
嶺隔山樵戴月回
此地能令高興別
中秋時近桂初開

舟中

竦立去帆波渺渺
深籠寒靄樹稀稀
象牙潭上風初急
龍霧洲前雪亂飛
山掩孤鐘分響到
沙明叢雁逐行歸
雕房熾炭行時令
阿那癡漁擁斷磯

答清江皮季賢見寄

古人千里夢相求
咫尺翻增隔絕愁
雲護牋題醒處墨
雨深樹色綠邊樓
文章正法追前哲
句律新功却俗流
為問幾時談到劇
壽楓南畔菊花秋

送族弟元迪

老去逢人怯送行
弟兄分手若為情
明時難使高才隱
為客當令遠業成
桂嶺寒煙通郢樹
逍遙夜雨入彭城
明朝便自堪回首
不待秋風過雁聲

題崔伯明詩卷

海底珊瑚不易收，俄然在手醒雙眸。
媧皇煉石天無壘，織女機絲月共秋。
一草作花生自別，三年刻楮巧堪羞。
客窗燈影誰為伴，雨響空欄徹夜流。

由清江赤城觀至寶塔寺暮歸樟鎮

自笑野人多野思，並村隨處意閒閒。
赤城觀裏折丹桂，寶塔寺前迎晚山。
隔水歸樵分路散，衝嵐飛鳥認林還。
祇言十里街頭近，不計黃昏便掩關。

酬揭曼碩贈別

來日君還在我前歸時我獨占君先
冰寒斷道鳴駝外
雪暗空村落雁邊
畫省諸公扶日月
南州孤客記山川
松聲多處黃精好
舉手青霞始學仙

任城南

自愛清遊自愴神
五千里外獨歸身
馬嘶平野呼鷹吏
犬吠寒沙射雁人
直北關山初合凍
近南氣候漸知春
蒼苔白石梅花路
長憶驅車魯水濱

秋夜獨立有懷

秋老谿貧獨夜時
邛枝移徧響蟲飛
山城鼓疊月生海
林屋燈寒風動扉
帶雪關河人別久
隔天書札雁來稀
忘情每有難忘者
黃葉一庭霜滿衣

偶成

初啼山鳥篆香斜
荏苒明時翫歲華
三日雨深春在水
一林煙濕暖生花
尋盟舊卷鈎簾展
開禁新醅隔竹賒
却憶去年歸漸近
半篷殘雪上寒沙

陳虛一尊師山房雨後

一片閒心倚石壇
千峰向背碧當軒
海門雨氣懸虹影
洞府香風粲鶴言
絕艷槿花深映戶
生紅荔子密圍村
早知千里移家近
久辦黃岡十畝園

得家信

俗尚難公不取諧
木陰深處玩蒼苔
身拋世累終相著
心怯鄉書重一開
極目雲天鴉陣黑
滿林風雨雁聲來
平生最有看花癖
何處溪頭發早梅

新淦阪步作

松筠色潤翠成圍
鶯鴨聲多水漸肥
隔縣販人爭野路
迎年浣女試新衣
暖煙黃柳知春到
殘雪青山伴客歸
茅屋酒旗隨處有
悠悠世事儘相違

閤皂山福地

兩崖松竹綠蕭蕭
時聽巖陰響野樵
鶴信蚤歸題籙客
蜂房分綴鍊丹寮
晉時月在淦源淺
粵國雲通勾漏遙
仙馭肯忘橋鼎地
風笙清夜落璫霄

舟夜

拓去蓬窗月滿襟
蕭蕭驚雁墮哀音
不知天意何倉卒
數疊寒雲萬里陰

海棠

冥鴻銜子錦川來
嫋嫋柔紅無數開
花睡未醒春未透
半空飛雨暗蒼苔

江行

悠悠行客漸黃昏
隔浦人家已掩門
誰與飛漚遊海上
亂鴉無數下西村

雪

天風搖動玉京移
九野蒼茫竟大奇
老樹細觀猶似昔
好山無處不堪疑

夕陽

斜陽盡入笛聲中
兩岼樵漁一水通
楊柳已疎楓漸落
黃花渾未識秋風

次史葯房池上即事韻

萬藥蜚香百草芽
蘆旌不動柳陰斜
幽禽還識攔邊客

曾立東風仗外花

秋原

稻花香裏聽潺湲
路入高原犢草閒
生長太平無所用
且隨殘照看秋山

初春

年華將去野梅知
春色初來柳眼移
偶到前村閒指點
數峰殘雪淡晴時

雨中遣興

萬里千巖夢寂寥
飛淙落澗夜蕭蕭
覺來忽聽兒童語
昨日榕陰在石橋

題瀟湘秋色圖

瑤瑟無聲水自流
黃蘆紅葉滿汀洲
蘋花欲採無尋處
一片閒情萬古愁

邗溝

衰柳殘荷併慘然
青山隔岸弄嬋娟
多情惟有邗溝水
長送江南過客船

微雨

一天微雨濕芳塵
紅綠相依幾處春
家在海棠花下住
傷心長是未歸人

放船

晚色重重放客舟
輕風吹漾落潮流
林巒盡異來時路
知是明朝到福州

豫章登舟作

城南無樹識神仙
閒往閒來四十年
西岼青山東岼塔

為誰相對老秋煙

象牙潭

水禽兩兩樹三三近浦遙峰隔嫩嵐
新換一天秋色別短篷行過象牙潭

自笑

世情多識事多諳長對雲山共笑談
煮石採芝隨意足憑君莫唱望江南

石倉歷代詩選卷二百五十五

欽定四庫全書

集部

石倉歷代詩選卷二百

五十六至
六十一

詳校官庶吉士臣范逢恩

侍讀臣孫球覆勘

總校官進士臣朱鈐

校對官主事臣張慎和

謄錄監生臣李敦源

欽定四庫全書

石倉歷代詩選卷二百五十六

明 曹學佺 編

元詩二十六

朱德潤

次方叔淵先生自趙屯歸城中韻

晨發趙屯路郊務曷勝紀
扁舟轉重灘棹急浪還泥村
深鳥競鳴時見出農耜
楓林宿靄收茅屋炊煙起依稀

遠江湖漸覺近城市逢人問歸程舟子行且喜宿雨起
新漲蒹葭沒秋水思倦名利塗醒心甘洗耳先生棄儒
冠高蹈出鄉里優游吳楚間生事丹砂裏壯年厭世紛
歲暮少知己欲拂珊瑚竿東溟釣青鯉

送馮海粟待制入京

人生百年間會面能幾何昔年別君去冰雪滿長河今
歲復送君堤柳青婆娑春塘漾輕舸曉日生微波柔櫓
數聲動遊子行不歌夢隨征帆杳思逐春流多落花粘

空樽錯落金巨羅聚散未足道且使朱顏駝

延祐六年九月廿二日渡楊子江

驅車丹陽麓津吏迎曉渡擊鼓動連艘櫂急浪花舞水
深蛟龍蟄日落鷗鳥度金山天畔樓雙塔逾青楸黃金
鑄古像歲月逐江流誰云限南北停橈歌壯遊

和虞先生榆林中秋對月

關前節候早秋半毳衣出牛羊散原隰漸告農務畢山
空衆木下栖鳥已喧唧日昏在牽牛魄月如晝白茫茫

現六合况散事一室仰觀浮雲變清暉易升沒

次韻貢仲章學士題仙山圖

浮生三十餘失志墮塵鞅南吳與北燕所歷如翻掌山
中猿鶴期別路成榛莽瑤草霜未凋靈芝日應長久聞
東王公御氣九霄上縹緲星霞裾虛室絕華想欲從道
無因寫此寄清曠

遊西山作

宛平佳山水歷歷蟠心胸偶登羣峰頂下瞰青蓮宮長

松騰翠蛟古磴妥垂虹雲開扶輿氣翕忽如仙蹤我來
方醉後遊覽徹九重長嘯出林杪振袂揚天風願同安
期生攜手凌昊穹

泛太湖訪友

扁舟去何所渺渺太湖陰依依桑梓村拍拍枕寒尋飛
雲入遐睇鳥道橫青岑篙師戒勿渡桑櫓力不任我身
雖骨立未肯折壯心放船當中流浩歌激清音何當被
宮錦再作峨眉吟

為張疇齋承旨作仙山晚渡

十月之交朔風其飄我來自南于以逌逌清霜著喬木
落葉灑江臯野橋駕略約蒼石浴寒潮客子暮擔簦蹠
蹠上輕舸澄江靜可渡不憚前山遙聞有列仙人煉玉
遺丹青鳳音雖寂寞素鶴可相招願尋長生道白日登
雲霄

為儀鳳山作

物靈不自顯鳳兮在山楸文章日益著律呂音相求山

川何宕蕘搖落關河秋征雁度空碧烏鳥集林丘仲尼
久已往郊數誰能留行看太平日君臣協成周瑞世當
一見孤鳴揚九州

葺舊廬作

先人昔處世行義如魯黔衰年當薄俗歷此憂患深敝
廬隔風雨高歌忘古今蔬食樂晨夕得散良盍簪牀頭
置周易牖下莓苔侵臨雲析疑義言論衆所欽皇天不
少假悲風起長林

和柯敬仲博士幽蘭

陽和徧巖谷，猗蘭發初芳。幽姿不自媚，隨風忽飄香。寧辭雨露恩，感此歲月長。願隨郎官握，得上中書堂。不慙山澤姿，高貴比金張。靈芝在宣室，豈獨懷沅湘。

和楊廉夫縣尹遊山

青山倚天高，巖谷入晦冥。虎豹居九關，無繇閉巖扃。企想賢哲士，寥落如晨星。寒風健鳥翮，暑雨吹魚腥。竹枝變韶舞，羯鼓如雷霆。黃流渾淳源，浮塵滓滄溟。鳳去幾

千載梧桐山更青

題唐明皇幸驪山圖

驪山西北高萬乘東南至霓旌蒼翠中閣道丹青裏憶
昔上林遊春寒多並轡羯鼓召花奴黃門催力士霓裳
曲未終驚動漁陽騎

十四日泊安陵

廣川六百里驛道上皇州紫極星晨近黃河日夜流村
明深夕火灘泊過年舟明發乘車去逢人說浪遊

和龔子敬先生遊春韻

烹茶熟旨酒坐石得嘉賓
好鳥時鳴晝幽花不放春
山遺今古事詩著往來人
楚地龔夫子諸生數問津

贈黃竹村老儒畫梅竹

烟水盱江渺丹陽度雪寒
久憐梅淡泊先問竹平安
夜月清詩思春風彩筆端
北來知己少歲暮欲彈冠

題拙作小圖

碧山高陰涔老樹立突兀
嵐光凝曉候隱見蒼林密
空

谷有佳人胡寧欲行役

其二

招提抱層巖欄楯出虛迴
微微宿靄收轉見蒼林靜
客子更何之扶筇躡雲磴

漢銅虎符歌

建章前殿金鳳凰兵符五出單于降
漢家明詔下雞鹿將軍夜送呼韓王
棘門驃騎多猛士酒酣擊劍願効死
征和丞相佐君王從此合符兵不起
霜風千年換陵谷

銅秀土花青似玉斑斑只憶漢彤庭射虎將軍夜逐北當時銜命出關中編鬚豈敢要奇功平原豺獸不擇肉印章千里空泥封

題張參政所藏太真上馬圖

開元朝野時清明姚宋廟謀多輔成紫宸前殿焚錦繡花萼樓高延弟兄那知暇豫生淫樂慢舞霓裳羽衣薄龍漿流禍入宮牆野鹿銜花汙簾箔春晴並轡曲江行回顧阿環嬌態生繡衣珠跂如花旋秦虢椒房恩寵鮮

宮中昇出錦裯兒兵滿漁陽人未知一朝犯順入宮闕
咸陽烟塵迷日月翠華雜沓驚塵蒙劔閣西迴渭水中
王臣下微同列國從此藩鎮爭豪雄人生富貴真迷途
傾城褒姒無時無慢道玄宗不知政試問當年無逸圖

仙山圖為趙彥昭賦

崆峒之山戴斗極疊嶂橫陳開碣石翠崖丹磴互低昂
複閣層欄轉空碧碧桃花落笙聲幽雙成吹玉彩鳳謳
跨鳳騰雲去無迹清猿啼斷層崖秋霞光隱映山長在

寰海茫茫隔烟靄舊遊仙侶謾招呼誤落人間幾千載
吳爭越戰何可數束書欲問桃源路畫圖空見避秦人
隔水漁郎不相顧

送李益齋之臨洮

綠陰滿京畿送子之臨洮臨洮何茫茫流出長城壕長
城岸阻玉關阨于闐蔥嶺河涼高羌氐兒郎走帶箭哀
笳風起斗擊刁良人西征二三載寶幢車馬聲塵遙如
今不用酒泉郡豈必坐使朱顏凋蒲萄首啗味雖美異

方土俗殊鄉里避地猶當似管寧受封應得論箕子願
從列騎擁旌旄歸來燕處華堂裏却話人情翻掌難曾
浥征袍淚如洗

王編修邀遊西山海子

晴川低迴山蒼蒼涵烟夾溪千里長山腰澗曲細泉響
下激石竇為微潢枯梢挽風秋色裏修林落葉隨長江
林疎石露見茅屋時有小徑通微茫招提橫截翠微上
欄干九曲雲飛揚自從束書離故鄉腳頭青鞋走山梁

山川悠長日月速躋攀分寸何能强太原高人知我意
請列紈素書滄浪丹青不關名利眼虎頭癡絕非王郎
百年有懷良可哂還拂長松思道場

讀隋書

廣通渠邊渭水流長安猛將懸兜年陳郎酣睡未知曉
采石夜渡江聲秋韓擒不待賀若報呼得蠻奴作鄉導
銅鉦一聲歌管闌望仙閣下旌旗繞兵家兒女髮照人
金井梧桐三墜身血痕已汙青溪草遺恨空憐高使君

當時只道明良會三十年間轉頭事江都未放錦帆回
晉陽城內驚塵起

德政碑

德政碑路傍立石高巍巍傳是郡中賢太守三年秩滿
人頌之刻石道傍紀德政傍人見者或歔歔借問歔歔
者誰子云是西家鐫石兒去年官差鐫此石官司督工
限十日上戶歛錢支半工每年准備遭驅責城中書生
無學俸但得錢多好作頌豈知太守賢不賢且喜豪民

來饋送德政碑磨不去勸君改作橋梁柱乞與行人濟
不通免令觀者嗟何補

水深圍

水深圍田疇蕩蕩如湖陂圍低水深岸不立雖有木石
將何施里正申官官不允徵糧每歲歸倉廩稻梁無種
長菰蒲民產陪償官始准今春水滂忽無津四分災作
五分申問渠何故作此弊府州伏熟成三分吏胥入鄉
日旁午二分徵作陪官賦倘逢人訴熟為荒破盡家貲

猶不補因此年年怕官惱水渰水深俱不報東南民力
日漸窮不願為農願為盜人生盜賊豈願為天生衣食
官迫之水渰償米或時稔陪糧無奈水深圍

題石崇錦障圖

洛陽金谷園中花雕玉為欄繡作遮瑠璃器多出珍饌
瑪瑙街長行鈿車椒房塗香貯歌舞曳珠珥翠籠輕紗
珊瑚扶疎三四尺王羊貴戚爭豪奢那知花淫風雨妬
古來山澤生龍蛇嬋娟墜樓寶玳碎月明夜半啼驚鴉

贈張鍊師遊京師

鍊師家住茅山竊玉泉為池翠雲繞丹成不隨笙鶴去
酒酣擊劍思燕趙古稱燕趙多義士京師貴官皆倒屣
君今挾策遠尋師聞道王公新奉旨黃金殿下拜天子
絳節朝元從此始他年雲外聽山呼茅山合在東封裏

除日

日行三百六十五今夕方除歲云暮人生憂樂百年期
又見日除當此度養和適情宜及時古今中壽七十稀

自非金石不可永刀圭誰保長生期彭宣老聃亦何之
不須更作送窮詩客聞此辭莫傷咨樽前且醉黃金卮

觀內廐洗馬

黃雲灑雨沙場秋灘高水平凝不流曉霜襲透蒼駝裘
圉人浴馬津水頭綠驃連錢雙驂驪日光射波脂膩浮
青絲脫鞵黃金鈎輕爬短刷濕未收三花剪髮平且柔
簡雲駿氣將無俦束芻斗豆豈馬羞茫茫豐草生林立
霜蹄胡為踏長楸振鬣一躍期天遊

賀張景亮知州致仕

角巾歸里舊儒冠
官轍馳驅涉萬端
楊柳碧溪春晝永
梅花白雪夜窓寒
朝廷有道容辭老
田野無羈得盡歡
幸喜玉堂遺業在
安居留待後人看

送劉德璋提點還宜興通真觀

通真仙觀欲凌虛
北谷先生畫隱居
玄鶴不歸華表柱
白雲長護紫泥書
桐棺已化人徒仰
鐵鎖高懸孰可舒
便欲束書陽羨路
青牛春晚又迴車

和王繼學治書

駒隙流光一鏡懸
虛明直與綺窓連
鑿開混沌知身外
別有山川在眼前
蓬島秋深稽漢使
桃源春暖避秦仙
敬亭山色看如畫
熊枕圍屏穩畫眠

送趙李文任湖廣州錄判

萬里奉親官署近
萱堂春早燕呢喃
桃花紅似郎君馬
楊柳青于從事衫
茗水漁舟烟浩渺
何山書舍石巉巖
莫思杜牧尋芳晚
剩有新詩寄一緘

俞元明參軍雲中以詩招飲就和韻時學士東
泉魯公大參叔能王公御史子昭郭公同行
上方山頭雲迷路石湖橋上作行春湖光萬頃送歸棹
山鳥一聲如喚人靜樂可忘軒冕貴清遊端勝綺羅塵
人間今古誰能賞詩思不如圖畫真

題豫章山房

豫章林老色參天擁護山僧丈室前豈為法身同草木
要驅塵慮出風烟茶甌香篆晨齋後竹几蒲團夜榻邊

獨有瀏陽歐學士題詩遙問不空禪

和虞先生題武當山張真人別業

嵐雨初晴綠樹新
松蘿夾屋淨無塵
洞花幽鳥時時別
野鶴孤雲日日親
紅霧半窓丹火候
青山萬古百年人
從君更覓方平宅
玄武門前作近隣

紅葉題詩

金殿風微拾墜紅
題詩聊寄玉溝東
芳情有意隨流水
細字無心學斷鴻
別館乍涼霜透幕
長門深夜月移宮

才情偶爾成佳配不道周南有國風

對鏡寫真

千章畫史托鉛華難寫春心半縷霞
兩面秋波隨彩筆一奩冰影對鈿花
情憐曉月秦川雁思逐朝陽漢樹鴉
不信雲間望夫石解傳顏色到君家

天宮寺僧寅叔恭藏宋王元之詩因次韻

隔屋長松覆滿齋童年竹馬記頻來
講堂經罷僧修史京國人歸袖惹埃
古佛歲深花蠹鐵長廊春淨雨生苔

塵緣未結東林社
禪榻留茶日暮迴

贈呂生善製牋者

玉肌均膩粉初乾
淡淡空青印碧欄
曉日長楊新賦就
墨雲時度玉螭寒

其二

羅文緝緝染湘流
中瑩晴空一段秋
莫問殺青千古事
漆書應讓管城侯

出郭

步出東臯隔市塵青山高下欲迎人汀花有意開何晚
野草無名亦自春

重過彭城

誰云河廣不容舸急漿臨風渡晚潮却望彭城舊遊處
黃樓碑畔屋蕭蕭

訪劉道士

雲林深處翠微多石室春深長薜蘿當代衣冠正高貴
不須閒誦采薇歌

陶淵明歸去來圖

甲子題年玩物華
門前栗里自桑麻
從他晉史書劉宋
別有黃花處士家

過岳鄂王廟

汴宋南遷社稷憂
忠魂應念國包羞
錢塘千載英雄恨
古木殘陽掩暮秋

賡郭祥卿飲酒圖

昔人好酒名雖在
死灰萬劫誰能全
我今悼昔復須飲

翻恨不生中古前

附虞集跋

澤民文章典雅而理致甚明獨惜以畫事掩其長然識者不厭其多能也自茲以往澤民當豐於文而嗇于畫可也按公墓志以延祐末年遊京師為趙文敏所薦獲事仁英二宗弗偶掛冠而歸時在朝康文獻子山虞文靖伯生袁文清伯長諸名公輩挽之不聽至正十一年江淮雲擾民多從賊公抗言于行省平章以安集為念

凡擲兵來附者一切貸之繇是杭州廣德所在民歸不數月而定攝守長興至則市無一人乃郊召父老告之以其故仍印號給其照身以識乎別寇且曰汝所怖者官軍爾保此則官軍不汝犯於是黎氓麋集未竟月得戶萬四千八百九十九復以病免歸年七十二卒初君之大母施夫人病亟其大父秘書君卜窆於陽山之原施夫人夜夢一衣冠偉丈夫告云勿奪吾宅吾且為夫人孫明日役者鑿地深可五尺得小石碑刻曰太守陸

君績之墓旁有小石刻曰此石爛人來換石果斷矣秘書君隨命掩之而更卜馬施夫人復夢偉衣冠者來謝曰吾真得為夫人孫矣是夜公生焉公仲子復古字仲陽季子中吉字季寧國初為翰林典籍給事等官家藏有睢陽五老圖即其九世祖會在宋朝議大夫兵部郎中壽八十餘與杜祁公為五老會者也

石倉歷代詩選卷二百五十六

欽定四庫全書

石倉歷代詩選卷二百五十七

明 曹學佺 編

元詩二十七

許有壬

神山避暑晚行田間用陶淵明平疇交遠風良

苗亦懷新為韻

田塍晚獨策及此時雨晴東畦與西疇泱泱流水聲豐

年已足歡清風復多情歸來藉草坐濁酒還自傾寧用
澆魂磊我懷無不平

其二

寢迹非絕世雅志便林丘青山足一至勝處靡不遊意
適輒忘返茲焉夏已秋遙遙目力窮青青盡田疇迷復
幸不遠歸歟無異謀

其三

昔人植松栢映蔚彌崇岡不為朝夕利千載當自長植

槿非不榮我圃因之荒白髮走畏途途修馬非良桑榆
賴非晚此樂且無央

宿臨湘贈誠之監縣

北風櫓聲乾晚泊斷磯下雲岫浮脩蛾霜空入平楚鳴
雁無處尋落日不可畫重岡護巖邑百里寄民社藉甚
賢大夫居然魯恭化豐年足粳稻沃壤盈桑柘我如無
心雲底事勞候迓爛醉得詩歸江山非傳舍

田家對雪

野老能留客柴門便反關落梅點衣上飛雪墜杯間地
僻偏宜竹窗幽更對山自憐真野逸瓶罄不知還

登後山觀湖漲時陰雨忽霽

桴鼓遠銅籠前驅列炬紅星茫寒拂地江影靜浮空聽
語漁村近連航水驛通不才慚傳食鮭菜足為供

橫浦登舟

水國宜秋晚羈愁感歲華清霜醉楓葉淡月隱蘆花漲
落高低路川平遠近沙炊煙青不斷山崦有人家

夜至魯港

山中日日雨松竹早知秋清響自深夜逸人無遠愁窗
虛聞葉落林暗見螢流對景因懷杜江村事事幽

荻港早行

世去重華遠名偕二石存溪寒清見底榕老亂垂根野
色偏宜晚民居僅似村曲江人已矣楚些擬招魂

神山雨

南征殊不惡樂事總相關馬上行思句舟中卧看山盡

收煙景去滿載月明還何往不自得浩歌天地間

白菜

土膏新且嫩筐筥薦紛披可作青精飯仍携玉版師清
風牙頰響真味士夫知南土稱秋末投簪要及時

地椒

凍雨催花紫輕風散野香刺沙尖葉細敷地亂條長楚
客收成裹奚童擷滿筐行厨供草具調鼎爾非良

尋梅

何以慰吾衰梅花秀發時晚香傳遠樹春雪避南枝林
靜來差早溪深行獨遲與君謀一醉及此未披離

應制天馬歌

聖元水德在朔方物產雄偉馬最良川原飲齏億萬萬
不以數計以谷量承平雲布十二閑華山百草春風香
又聞有駿在西極權奇倣儻鍾乾剛茂陵千金不能致
直以兵戈勞廣利當時紀述雖有歌侈心一啟何由制
吾皇慎德邁前古不寶遠物物自至佛郎國在月窟西

八尺真龍入維繫七逾大海四閱年滌京今日才朝天
不煩剪拂光奪目正色呈瑞符吾玄鳳簪龍臆渴烏首
四蹄玉後鑿其前九重喜見遠人格一時便勅良工傳
玉鞭錦鵲黃金勒瞬息殊恩備華飾天成異質難自藏
志在君知不在物方今天下有道時絕塵詎敢稱其力
臣才罷駑亦自知共服安輿無更軼

題友人所藏明妃圖

臂香骨沁守宮雉金鎖重門怨銀鑰深宮有眼不識春

畫長時聽雲間樂平生所見惟監宮今朝豈期見畫工
君王知畫不知妾薄命已分如秋蓬黃沙漫漫天無極
驚飈吹老紅芙蓉穹廬明日又何處此生遂負歸南鴻
和親納侮號上策建議詒謀婁敬責妾身雖苦免主憂
猶勝專寵亡人國關山寥落夢亦迷嫁雞正爾隨雞飛
人間生女莫望貴只可近作田家妻琵琶聲斷霜天月
青冢至今青不歇後來却有蔡文姬千古胡笳動哀拍

喜逢口

灤陽驛東北四十里有雙塚世傳昔有久戍不歸者
其父求之適相遇此山下相抱大笑喜極而死遂葬
于是俗應謂之喜逢口亦猶望夫之有石也雖莫究
其世代姓氏而其言有足感人者故作是以紀之

兒寒解衣重撫摩兒饑推食就忍訶長成與國遠負戈
一去不返當如何去時云戍東北鄙直出榆關度遼水
白頭老翁形影俱豈但山川千萬里天教此地適相逢
父曰從天墮吾子笑疲樂極俱殞身誰謂情鍾遽如此

官家開邊方未已同生又別寧同死山雲漠漠風颼颼
山頭雙塚知幾秋當時不忍一朝喜今日翻飛千載愁
猶勝貞女化為石終古孤身雙不得清江寒影日悠悠
行人一去無消息

送黃文復歸長沙

半生湖海夢依稀但誦湘南遠寄詩先友凋殘公獨健
故園荒盡我纔歸百年未滿常憂畏千里相逢又別離
他日瓌江松下路西州難似此沾衣

九日陪闔臺諸公登石頭

一江環抱四山圍，
酌節追歡剩費詩。
雁影不移雲盡處，
秋光都在雨晴時。
當年玉樹人空歎，
明日黃花蝶豈知。
便駐高軒拚醉倒，
絕勝無酒繞東籬。

神山即事

京塵汨沒已華顛，
恰是山居第一年。
松月照窗詩入聖，
竹風吹榻夢遊仙。
隨人久作悠悠者，
處世方知綽綽然。
尚愧未能忘口腹，
時勞昆季致肥鮮。

和謝敬德學士見寄

平生踈懶是天姿
今歲春來起亦遲
好酒或如陶靖節
杜門深愧鄭當時
向來事業惟供笑
如此韶光忍廢詩
館閣真才試枚舉
鵠山陪預恐難期

又

淡日輕風弄野姿
江天寥廓鳥飛遲
從知宇宙多閒地
誰信襟懷勝舊時
夜雨不驚逋客夢
暮雲猶入故人詩
山中亦有陽春曲
拂拭朱絃待子期

登岳陽樓

半空輪奐壯巴丘
消得騷人一繫舟
雲氣遠攜湘雨至
湖光寒入蜀江流
山川信美非吾土
天地無窮有此樓
三十四年如夢過
可憐華髮賦重遊

黃陵廟

黃陵廟下草萋萋
水遠山長聽竹枝
獨恨未繇同死處
重華寧有再來時
霜筠苦節留千古
埜樹愁雲接九疑
珍重韓公脩廢墜
居民猶得薦江籬

過湘潭

江邊楊柳翠縈迴，柳外人家罨畫開。
一夜東風花落盡，千年華表鶴歸來。
暮雲山出遠浮黛，春雨水添濃潑醅。
莫艤扁舟訪陳迹，白頭懷抱易生哀。

閒居雜詩

半山雲樹接脩篁，鎮日無塵到草堂。
窈牖風來書葉亂，膽瓶花落硯池香。
壺觴自酌教微醉，松菊猶存及未荒。
護果灌園常不暇，誰知閒裏更多忙。

其二

鵲山東北接郊墟郭影嵐光畫不如九十日春朝暮雨
兩三間屋古今書庭花紅礙經行處園樹青回剪伐餘
滿地蒼苔愁踏破年來深喜故人疎

和傅汝礪寄來韻

江水舟航日夜東故人音問得常通君才能挽千鈞力
我老惟懷一畝宮自古山林容小隱只今臺省有諸公
欲知別後詩成處都在花香竹影中

琳宮詞次安南王韻

山中活計只餐霞
世事茫茫日已賒
身到玉堂無暇晷
夜深猶草侍中麻

和康里子山韻

洞深春早透蘭芽
窗曉雲香亂海霞
萬丈紅塵飛不到
紫簫吹綻碧桃花

行縣書所見

春雨初晴漲稻畦
石渠分水灌麻池
醉翁社散忘歸路

行過柴門尚不知

神山雜詩

山留殘雨濕拖雲竹引鮮飈細灑人詩思清如寒水玉
休教落紙恐沾塵

其二

窗扉九夏鎮長開一榻無塵地有苔恠底山禽栖不穩
竹林風雨送涼來

次黎東山鳳棲別墅韻

風漪翠舞躬耕稻雲錦紅酣手種花策杖尋君迷不得
有書聲處是君家

書所見

田園賣盡及兒孫少壯流移老病存一段升平好圖畫
人間惟欠鄭監門

夜次館陶

三老趨程不憚勞船頭坐看月輪高煙村漁火微茫外
一簇人家是館陶

即事

幾家門繫釣魚船
一陣風香燎麥煙
畫出太平村落景
酒旗多在綠楊邊

蘇彥良西堊堂

蒼苔滿迳樹連村
中有幽人屐齒痕
此去客來宜定約
無詩無酒不開門

石倉歷代詩選卷二百五十七